



PM-Kerala

प्रधानमंत्री नरेंद्र मोदी होर अज्ज केरल दे वायनाड जिले च ल्हास-पस्सियां पौने करी बुरी चाल्ली प्रभावित होए दे इलाकें दा दौरा करै करदे न। श्री मोदी होर कन्नूर ब्हाई अड्डे पर पुज्जे जित्थे उंदा सोआगत गवर्नर आरिफ मोहम्मद खान ते मुख्मन्त्री पिनाराई विजयन होरें कीता। आकाशवाणी दे कोच्चि संवाददाता मुजब प्रधानमंत्री होर पिच्छले म्हीने दी 30 तरीक गी उत्थे बड्डे पैमाने पर ल्हास-पस्सियां पौने करी तबाह होए दे इलाकें दा ब्हाई सर्वेक्षण करडन। श्री मोदी होर इक राहत शिविर ते इक मुकामी अस्पताल दे अलावा आपदा दी मारै हेठ आए दे इलाके च फौज आसेआ बनाए गेदे बेली ब्रिज दा दौरा बी करी सकदे न। ओह प्रभावत लोकें ते आपदा च बचे दे लोकें कन्नै गल्लबात करडन। प्रधानमंत्री होर इक समीक्षा बैठक दी अध्यक्षता बी करडन, जिस दरान उनें'गी आपदा दी मारै हेठ आए दे इलाकें च चलाए जा'रदे अभियानें दे बारै च तपसीली जानकारी दित्ती जाहग। नमीं दिल्ली लेई रवाना होने शा पैहले ओह संज्ञां तगर कन्नूर परतोई औडन। प्रधानमंत्री हुंदा एह दौरा प्रभावत लोकें दी आबादकारी लेई मता महत्वपूर्ण ऐ जेहडे बक्ख-बक्ख राहत कैपें च रवै करदे न। सीपीआई-एम दे नेतृत्व आहली एलडीएफ ते बरोधी यूडीएफ, दौनें गै केन्द्र सरकार गी अपील कीती दी ऐ जे इसी राश्ट्री आपदा घोशत कीता जा।



Cabinet PMAY

केन्द्री मंत्रिमंडल नै प्रधानमंत्री आवास योजना (शैष्टी) दे दुए चरण गी मंजूरी देई दित्ती ऐ ते कन्नै माली ब'रे 2024-25 थमां 2028-29 दरान प्रधानमंत्री आवास योजना-ग्रामीण दी अमलावरी गी बी मंजूरी दित्ती ऐ। जंदी रातीं इस बारै मीडिया गी जानकारी दिंदे होई सूचना ते प्रसारण मंत्री अश्विनी वैष्णव होरें दस्सेआ जे प्रधानमंत्री आवास योजना तैहत 3 करोड़ नमें मकानें दा निर्माण कीता जाहग। एहदे तैहत ग्रामीण इलाकें च 2 करोड़ घर जिसलै के शैष्टी इलाकें च 1 करोड़ मकान बनाए जाडन। एह योजना कुल 3 लक्ख 60 ज्हार करोड़ रुपें दी होग।

प्रधानमंत्री आवास योजना शैही दे दुए चरण तैहत 5एं ब'रें च शैही इलाकें च किफायती दरें पर घरें दे निर्माण, घरें दी खरीद यां कराये पर मकान लैने आस्तै 1 करोड़ शैही गरीब ते मझाटले तबके दे परोआरें गी माली सहायता उपलब्ध करोआई जाहग। इस योजना तैहत 2 लख 30 जहार करोड़ रुपें दी सरकारी सहायता दित्ती जानी ऐ।

<><><><><><><>

Terrorist Sketch

जिला पुलस कटुआ नै ओकड़े 4 आतंकवादिएं दे स्कैच जारी कीते न जिनें'गी खीरी बारी कटुआ ते उधमपुर जिलें दे उच्चे पहाड़ी इलाकें जिआं मल्हार, बनी ते सियोजधार च दिक्खेआ गेआ हा। इनें आतंकवादिएं पर 5-5 लख रुपें दे ईनाम दा ऐलान कीता गेआ ऐ। सोशल मीडिया दी इक पोस्ट च कटुआ पुलस नै इनें आतंकवादिएं दे स्कैच सांझे करदे होई आखेआ ऐ जे आतंकवादिएं बारे ठोस जानकारी देने आहले गी उचित ईनाम दित्ता जाहग।

<><><><><><><>

BSF Security

सीमा सुरक्षा बल नै जम्मू च भारत-पाकिस्तान बन्ने पर आतंकवादी घटनाएं च बाहे दे मद्देनजर सुरक्षा गी निगगर करने लेई पंजाब-जम्मू अंतर-राज्य सीमा पर अपने जोआनें दी गिनतरी बधाई दित्ती ऐ ते कन्नै सीसीटीवी कैमरे बी लाए न। बीएसएफ नै जम्मू कन्नै लगदे पठानकोट जिले दे गुरदासपुर इलाके च बाहू जोआनें गी तैनात कीता ऐ। केंद्री गृह मंत्रालय नै हाल च गै जम्मू ते पंजाब-जम्मू सीमा पर तैनाती लेई ओडिशा थमां बीएसएफ दिएं द'ऊं बटालियनें गी वापस सद्देने दा हुकम रसाल कीता ऐ। इनें सुरक्षा हीलें च बाहू जम्मू खित्ते च बघदी आतंकवादी गतिविधियें गी दिक्खदे होई कीता गेआ ऐ। इनें आतंकी गतिविधिएं करी पिच्छले किश म्हीनें दरान 20 कोला मते सुरक्षाकर्मी ते नागरिक मारे गे न।

<><><><><><><>

Delhi Police Terrorist Arrest

दिल्ली पुलस दे विशेष सैल नै बंधश लग्गे दे आतंकी संगठन आईएसआईएस दे इक आतंकवादी गी गिरफ्तार कीता ऐ। विशेष सैल आस्सेआ दित्ती गेदी जानकारी मूजब एह आतंकवादी पिछले कोई इक ब'रे थमां फरार हा ते ओहदे उप्पर त्रै लक्ख रपे दा इनाम बी रखेआ गेदा हा। राष्ट्रीय जांच अर्जेसी एनआईए गी मुंबई ते दिल्ली च आतंकवाद सरबंधी दऊं मामलें च एहदी तलाश ही। गिरफ्तारी दे समें इस आतंकवादी कोला इक पस्तोल, दो मोबाइल फोन ते त्रै जींदा कारतूस बी बरामद कीते गे न।

<><><><><><>

Darhal Rains

बन्ने आहले जिले रजौरी दी द्रहाल तैहसील दे सोकर ते परोडी ग्राएं च हाल दिएं जबरदस्त बरखें करी शिड़कें ते फसलें गी बड़ा मता नुक्सान पुज्जा ऐ। अधिकारिएं सुत्तरें मुजब, हाल दिएं बरखें करी द्रहाल दे दऊं ग्राएं च जिमीं घस्सने दी घटना बी पेश आई ऐ। इस करी सरकारी जिमीं, शिड़कें ते खेत्तरें च लग्गी दी फसलें गी बी मता नुक्सान होआ ऐ। अधिकारिएं मुजब, उनें नुक्सान दा जायजा लैता ऐ ते इनें दौनें ग्राएं च शिड़कें थमां मलबा हटाने लेई अमले ते मशीनें गी कम्मै पर लाया गेदा ऐ।

<><><><><><>

World Lion Day

अज्ज बब्बर शेरें सरबंधी कुल संसारी ध्याड़ा मनाया जा करदा ऐ। एहदा मकसद जंगल दे राजा दे संरक्षण दे बारै च जागरूकता बधाना ऐ। आलमी सतह उप्पर बब्बर शेरें दी घट्ट होआ करदी गिनतरी गी दिक्खदे होई इंदे संरक्षण लेई खास जतन कीते जाने दी सख्त लोड़ ऐ। भारत च सांस्कृतिक ते पर्यावरण दी नजरी कन्नै बी बब्बर शेरें दे संरक्षण दा महत्व होर बधी जंदा ऐ। स्हाड़ा मुख्य एशियाई बब्बर शेरें लेई इक सुरक्षित थाह ऐ। एशियाई बब्बर शेर छड़े गुजरात दे गिर दे जंगलें च गै पाए जंदे न। पर्यावरण मंत्रालय ने इक बयान च आखेआ ऐ जे इस इलाके च संरक्षण सरबंधी जतनें कन्नै बब्बर शेरें दी गिनतरी 2015 च जित्थे 523 थमां बधियै 2020 च 674 होई गेदी ऐ।

15 अगस्त 2020 गी घोषित प्रोजेक्ट लॉयन, एशियाई बब्बर शेरें दे भविष्य लेई बड़ी महत्वपूर्ण पैलकदमी ऐ। इस परियोजना तैहत बब्बर शेरें के कुदरती आवास आहले इलाकें च सुधार आहना, उन्नत टेक्नोलाजी कन्नै उंदी निगरानी ते मनुक्ख ते जंगली जनौरें बश्कार संघर्ष गी घट्ट करने दे जतन मुक्ख तौर पर शामिल न। प्रधानमंत्री नरेन्द्र मोदी होरें बब्बर शेरें दे संरक्षण लेई कम्म करै करदे सब्बनें लोकें गी अज्जै दे ध्याड़े दी मुबारकबाद दित्ती ऐ। सोशल मीडिया दी इक पोस्ट च श्री मोदी होरें आखेआ जे भारत अंदर गुजरात दे गिर जंगलें च बब्बर शेरें दी इक बड्डी आबादी रौंढदी ऐ। उनें दुनिया भरै दे वन्यजीव प्रेमिएं गी साद्दा दित्ता ऐ जे एशियाई बब्बर शेरें गी दिक्खने लेई पक्क गै गिर दा दौर लान।

<><><><><><>